

共同經課 - 1 出埃及記十六章二節~十五節

2 以色列人全會佇曠野哀怨摩西、亞倫，3 以色列人對in講：「唔值著阮佇埃及地、死佇耶和華的手；彼時阮有肉滿鼎，有餅通食夠飽。恁導阮出來，到此個曠野，是欲互此個全會攏餓死！」4 耶和華對摩西講：「看啊！我欲對天落米糧互恁。百姓著出去，逐日拾逐日的額，我通試驗in，看in欲趁我的法度抑唔。」5 到第六日，in著將所拾入來的備辦好勢，比逐日所拾的重倍多。」6 摩西、亞倫對以色列眾人講：「到下昏，恁欲知導恁出埃及地的是耶和華。」7 明仔早起，恁欲看見耶和華的榮光，因為耶和華聽見恁哀怨伊。阮算甚麼，恁竟然哀怨阮？」8 摩西閣講：「耶和華下昏時欲互恁食肉，早起時欲互恁食餅到飽；因為恁哀怨耶和華，伊攏聽見。阮算甚麼，恁唔是哀怨阮，是哀怨耶和華。」9 摩西對亞倫講：「你著給以色列人全會講：『恁著就近耶和華的面前，因為伊已經聽見恁的哀怨啦。』」10 亞倫抵抵對以色列人全會講話的時，in向曠野啲看，看啊，耶和華的榮光佇雲中顯現。11 耶和華對摩西講：12 「我已經聽見以色列人的哀怨。你著給in講：『到黃昏的時，恁欲食肉，早起欲有餅通食飽，恁就知我是耶和華——恁的上帝。』」13 到下昏，有鶴鶉飛來，遮蓋營盤；天光早佇營盤四圍的地面，有一重的露水。14 露水乾的時，看啊，曠野的地面有細細圓圓的物，細到親像霜。15 以色列人看見，唔知是甚麼，大家相及講：「這是甚麼啊？」摩西給in講：「這就是耶和華互恁食的餅。」

共同經課 - 2 詩篇一百零五篇一節~六節，三十七節~四十五節

1 恁著感謝耶和華，求叫伊的名，佇萬百姓的中間報揚伊的所做！2 著向伊吟詩，向伊唱歌謳嘍！談論伊一切奇妙的所行！3 著因為伊的聖名來誇口！尋耶和華的人，心內著歡喜！4 著求耶和華及伊的權能，常常尋見伊的面。5 伊的奴僕亞伯拉罕的後裔，伊所揀雅各的子孫啊，恁著數念伊所做奇妙的事及伊的神蹟，及伊的嘴判斷的話。6 (見詩。) 37 伊導in出來帶銀帶金；伊的支派中無一個軟弱的人。38 in出來的時，埃及就歡喜；因為埃及曾為著in來驚。39 伊起雲做布篷，暝時用火照光。40 in一下求，伊就互鶴鶉飛來，閣用天的餅互in飽足。41 伊拍開石磐，水就湔出；佇乾地，水流親像河。42 因為伊記念伊聖的話，及伊的奴僕亞伯拉罕。43 伊導伊的百姓大悅出來，導伊揀的百姓唱歡喜的歌出來。44 伊將列國的地賞賜in，in就承接許個百姓著磨所得著的，45 欲互in趁伊的律例，守伊的法度。恁著謳嘍耶和華！

共同經課 - 3 腓立比書一章二十一節~三十節

21 因為論到我，活就是基督，死就是利益。22 設使活佇肉體，這是做我的工的果子，我也唔知欲怎樣揀。23 我佇兩難的中間，真愛倒去及基督相及佇啲，是不止卡好。24 總是猶原住佇肉體，為著恁的緣故是閣卡要緊。25 我已經深信此個，就知我欲猶原佇啲，也及恁眾人相及佇啲，致到恁的信得著進步閣歡喜，26 互恁佇基督耶穌的誇口，為著我會愈充滿，是對及恁閣佇啲。27 獨獨恁行代誌著合佇基督的福音，互我豈採來見著恁，抑是離開恁，會聽見恁的代誌，就是恁佇一個神倚在，用一心為著福音的信相及出力。28 凡代誌無互對敵拍驚，這是做in滅無的憑據，也是做恁得救的憑據，攏是對上帝。29 因為已經賞賜恁為著基督，唔若信靠伊，閣為著伊受苦。30 恁出力交戰，及前所看見我的、現今所聽見我的相同。

共同經課 - 4 馬太福音十章一節~十六節

1 「因為天國親像家主透早出去倩工入伊的葡萄園，2 及做工的人約一日一錢銀，就差in入伊的園。3 九點的時出去，閣看見有閒閒倚佇街市裡的，4 就給in講：『恁亦去葡萄園，我欲照公道互恁。』in就去。5 十二點及三點的時閣出去，也按呢做。6 五點的時出去，閣抵著有人倚啲，就給in講：『恁啥事通日間閒閒倚佇遮啊？』7 in給伊講：『因為無人倩阮。』伊給in講：『恁也去葡萄園。』8 到日暗，園主給伊的管家講：『叫做工者，互in工錢，對路尾來的起，到代先來的為止。』9 許個五點鐘所倩者到，逐個領一錢銀。10 代先倩者到，in拍算欲領卡多，唔拘in也逐個領一錢銀。11 領了，就對家主耦耦唸講：12 『阮通日拖磨受熱，許個路尾倩的，做工一點鐘久，竟然互in及阮平？』13 伊就對in一人應講：『朋友啊，我唔是無公道款待你，你豈唔是及我約一錢銀嗎？14 你的你提，做你去！我欲互此個路尾的及你平。15 用我的物行我所愛豈袂做得？抑是因為我做好，你啲目赤嗎？』16 親像按呢，路尾的，欲做代先；代先的，欲路尾。」